

Bangunan baru NUS dinamakan sempena dermawan Indonesia

SEBUAH bangunan baru setinggi 17 tingkat dengan kemudahan bagi pelajar dan penyelidik bidang perubatan telah dilancarkan di Universiti Nasional Singapura (NUS) semalam.

Bangunan Yayasan Tahir, yang dirasmikan Menteri Pendidikan Heng Swee Keat, dinamakan sempena seorang ahli perniagaan Indonesia yang terkenal dan dermawan, Dato' Sri Dr Tahir.

Beliau telah mendermakan \$30

juta kepada NUS pada 2012 bagi tujuan penyelidikan bioperubatan, projek memperbaiki pendidikan perubatan, dermasiswa dan biasiswa pelajar.

Bangunan di kampus Kent Ridge itu bakal menempatkan makmal penyelidikan dan bilik buat pelajar di Sekolah Perubatan Yong Loo Lin.

Bangunan itu juga dikongsi bersama Sekolah Kesihatan Awam Saw Swee Hock, pelajar bidang farmasi dan kimia.

Dua projek utama yang dibiayai daripada hadiah Dr Tahir itu adalah versi maya mayat manusia 3D untuk mengajar tentang pembedahan anatomi dan platform persekitaran maya yang akan membolehkan pembelajaran melalui senario serupa kehidupan sebenar seperti keadaan sebuah bilik kecemasan hospital.

Dana itu juga akan digunakan bagi memperbaiki kurikulum perubatan dan melatih pelajar perubatan untuk bekerja dengan jururawat dan ahli profesional bersekutu.